

REGULATIV

per il

VISCHINADI DE SEDRUN

Art. 1

Il vischinadi de Sedrun secompona ord las fracziuns dil vitg naven dal Drun (Quolm - Devi) tochen Drun Bugnei.

Art. 2

Radunonza generala

Ils vischins de Sedrun seraduneschan annualmein sil pli tard da miez november per deliberar tuttas fatschentas pendentas da quei temps. Tier quella radunonza ha scadin fiug il dretg de delegar ina persuna. Tgi che pren buca part dellas radunonzas sto star dils conclus pri. Igl onn de quen ed uffeci entscheiva da miez november. Las necessarias publicaziuns per il termin dellas radunonzas ein de far sil pli pauc 3 dis avon en ils loghens usitai. Tuttas radunonzas vegnan fixadas dalla suprastonza ne sin giasch dils vischins de 10 fiugs. En la competenza de quella radunonza ei era d'eleger ils representants dil vischinadi en la commissiun gronda, che ha de vegnir fatg mintgamai suenter las elecziuns de vischnaunca.

Art. 3

La suprastonza

La suprastonza secompona ord 3 commembers. In president, in actuar ed in cauvitg. Quels commembers vegnan elegi mintg'onn, ein denton reelegibels.

- a) Il president ha l'obligaziun de preparar las tractandas, convocar e menar las radunonzas.
- b) Igl actuar meina exact protocol dellas radunonzas dil vischinadi.
- c) Il cauvitg pladescha tuts necessaris pasturs e survigilescha quels en lur lavur. Plinavon ha el de tagliar pustretsch e survigilar igl incasso.

Il cauvitg motivescha, visa e survigilescha il mundar las pastiras de casa, sco era il rugalar e mantener trutgs, begls, classenas etc. Per il foss dil dutg a Cungieri ha il cauvitg de numnar in survigilader che procurescha ch' il foss resti aviarts.

Il cauvitg numna dus controlladers de fiug, sco era dus pinders. Ei ha de vegnir menau controlla de quels che han mintgamai fatg quels uffecis. Il cauvitg sa prender plaid e cussegl tier ils dus auters commembers, en tuts fatgs.

Obligaziuns visavi la vischnaunca ha il cauvitg:

- a) Reparter ils cedels de votar.
- b) Visar e survigilar la lavur cumina.

Incassos de daners che pertuccan buca il vischinadi eis el buca obligaus de far, num ch' el vegni bonificaus persuerter.

Art. 4

Indemnisaziuns

Il president ed actuar retscheivan per lur uffecis negina bonificaziun. Il cauvitg vegn indemnisaus maximum cun frs. 50.— per onn.

Art. 5

Obligaziun de surpender uffecis

Obligai de far president ni actuar per in onn ein tuts vischins, sesents el vischinadi, cun e senza tiers.

Cauvitg ei scadin vischin obligaus de far ch' ei sesents en il vischinadi e posseda tiers igl onn dell' elecziun, quei vul tiers gronds ni era mo cauras ni nuorsas. Tals vischins che possedan negins tiers e vulan far voluntari cauvitg ein era elegibels. Per la nomina de cauvitg duei vegnir priu risguard sin las relaziuns de familia.

Tals che han gia fatg cauvitg 1945 cun e tochen 1954 san buca vegnir obligai de surpender pli igl uffeci. Sur 60 onns ei scadin libers de far cauvitg.

Art. 6

Finanziaziun

Per finanziair la bonificaziun de cauvitg, sco era ulteriuras spesas che savessan nescher ord il menaschi dil vischinadi en general vegn incassau annualmein:

- a) Da tuts possessurs de tiers 1.— fr. per fiug.
- b) Da tuts vischins che possedan negins tiers fr. 1.50 per fiug.

In ulteriur avanzament dil sura incasso sa vegnir impundius vid begls etc. sco era vid autras nizeivlas caussas dil vischinadi.

Art. 7

Uorden de tiers

En il vischinadi de Sedrun sa scadin fiug tener in tier grond per in. Il far diever dil dretg d' in auter ei denton mo lubiu a tals che han agen prau ni per tscheins, quei vul dir quei tal che lai siu dretg ad in auter sto luvrar agen prau ni luvrar prau per tscheins.

Tuts tiers che vegnan mess sin pastira ston esser sut pastur.

- a) Pertenent cauras, nuorsas e piertg mascal vala mingamai igl uorden sco secunvegniu denter ils vischinadis de Sedrun e Gonda. Per quels fatgs cun il vischinadi de Gonda ei il cauvitg de Sedrun competents senza ils auters commembers della suprastonza.
- b) Per las vaccas de casa vegn pladiu in paster cun paga fixa e la spisa. Quel duei esser la damaun sil pli tard las 7 ord il vitg cun las vaccas, dis de bialaura.

Il paster entscheiva siu survetsch cun la cargada dellas vaccas e finescha cun dar lartg. La spisa gauda el en roda, mintga vacca ni genetscha 2 dis. La spisa vegn ulivada mintg' onn. Il prezi vegn fixaus sin 3— frs. per di.

Tuttas vaccas e genetschas de casa che gaudan pastira, ston vegnir messas sut il pastur dil vischi-

nadi. Ina excepziun vala per tiers malsauns, che ston puspei vegnir mess sill' alp suenter esser vegni sauns.

- c) Sin pastira entuorn il vitg astgan mo vadials giuvens, naschi il mars e pli tard, vegnir paschentai. Tuts auters vadials han de vegnir cargai naven. Sin giavisch dils vischins e la segironza de cargar silmeins 30—40 vadials ha il cauvitg l' obligaziun de pladir vadlèr sin la Val.
- d) Tenor basegns e sin giavisch eis ei era de pladir in purtgè per il temps de stad. Vegn ei pladiu purtgè sco sura allegau, ston tuts pors che vegnan schai ora sin pastira gidar a pagar il pustretsch. Ariguard igl enferar ils pors secloma igl artechel 18 dil regulativ de pasculaziun e de polizia de funs della vischnaunca de Tujetsch:

«Ils salvanoris pors han de tuts temps ded esser enferrai sufficientamein, cass cuntrari astgan els buca guder pastg cumin e pastira. Pors sut 6 meins han d' haver en 2 fiars, pli vegls silmeins 3 fiars. Scadin che lai ora salvanoris pors la stad a casa sin pastira ha de vischinar quels cun il purtgè dil vischinadi e purtar la grevezia tenor temps.»

Art. 8

Quest regulativ passa en vigur cun l' approbaziun dils vischins de Sedrun e la suprastonza communal. Cheutras crodan tuts statuts e regulativs pli vegls de medem character ord vigur.

Quest regulativ ei vegnius approbaus dalla radunonza dils vischins de Sedrun, ils 16 de mars 1954.

Tujetsch ils 5 d' avrel 1954.

Il president: **Gamboni G. Giusep**

Igl actuar: **Bruno Soliva**

Il cheu avon regulativ per il vischinadi de Sedrun ei vegnius approbaus dalla suprastonza communal

Sedrun / Tujetsch, ils 5 d'avrel 1954.

Il president: **Jacomet Placi**

Igl actuar: **Hitz T.**